

# Il Parlament d'Europa ha dà glisch verda per il Forum per linguas minoritaras

■ (cp) **Las minoritads naziunalas tradiziunalas, represchentadas da l'UFCE, l'Uniun federalistica da las cuminanzas etnicas europeicas, obtegnan in forum da contact stabel ensemen cun in'intergruppa per minoritads tradiziunalas en il Parlament d'Europa.** Ina delegaziun da l'UFCE e da la GCEE, la Giuventetgna da las Cuminanzas Etnicas Europeicas, ed ils delegads da l'intergruppa èn sa cunvegnaids davart in tal forum a chaschun d'ina sesida en il Parlament d'Europa a Strasbourg. A la sesida han tranter auter preni part ils deputads *Csaba Tabajdi, Michl Ebner, Kinga Gal, Henrik Lax, Bernt Posselt, Ljudmila Novak, Istvan Szent-Ivanyi, Tatjana Zdanonka* ed *Ignasi Guardans Cambó*.

«Grazia a la stretga collavuraziun da l'UFCE cun il Parlament d'Europa survegnan las minoritads europeicas ina vusch bler pli ferma che fin ussa.

Cun il forum han gist las minoritads senza retroterra culturala la chaschun da render attent a lur situaziun ordvart speziala entaifer l'Europa e d'elavurar comunablamain soluziuns pussaivlas. Nus avain fatg in emprim ed impurtant pass per vegnir percepids meglier», ha ditg *Andrea L. Rassel*, il vicepresidente da l'UFCE, suenter la sesida a Strasbourg.

La proposta elavurada da *Jan Diedrichsen*, l'incumbensà da l'UFCE e da la GCEE, e da la Sorba *Susann Schenk*, ha chattà sustegn en tut las fracziuns e sveglia in viv barat d'ideas, co ch'ins pudess rinforzar supplementarmain la lavur a favur da las minoritads europeicas. «A noss avis èsi decisiv ch'i dettia ina collavuraziun formalisada, damai in gremi stabel che agescha tenor in urden da fatschent», ha ditg *Diedrichsen*, che ha preschentà la proposta en il parlament.

Il parlamentaris han proponì da sviluppar vinavant il forum planisà ad ina «giunta consultativa» dal parlament da l'UE. Questa idea vegn ussa discussiunada cun il president dal parlament *Hans-Gert Pötering*. L'UFCE vegn a preparar ensemen cun il secretari general da l'intergruppa, *David Koranyi*, in urden da fatschenta. Previs èsi da fundar uffizialmain l'entschatta da l'onn proxim il nov forum europeic dal parlament. «Igl è stà ina sesida productiva e nus collavurain a moda fidada cun l'UFCE, ch'è nossa pli impurtanta partenaria strategica en la lavur a favur da las minoritads. Jau sun persvas ch'in tal forum po daventar in'impurtanta plattform da barat tranter la politica e las singulas minoritads, e che nus vegnin ad ans engaschar comunablamain per ina meglra protecziun da las minoritads en l'Europa», ha ditg *Csaba Tabajdi* suenter la seduta communabla.